



Gist en corpore èn ils presidents da musica da tuts ils chantuns da la Svizra orientala vegnids a Scuol per remunerar Robert Casanova (davant dretg).

FOTOS G. N. STGIER

# In degn e cordial cumià

Uniun chantunala da musica dal Grischun

DA GION NUTEGN STGIER / ANR

■ **Da preschent ha l'uniun stgars 2900 commembras e commembers e dapi sonda passada in nov president. A Scuol han delegadas e delegads elegi Andy Kollegger sco successur da Robert Casanova. Cun el è sa retratg in um che ha sia entira vita vivì per la musica.** Musicantas e musicants da la Societad da musica Scuol cun la presidenta *Annatina Filli* han organisà cun bler plaschair la radunanza annuala da l'Uniun chantunala da musica dal Grischun. Sut la direzzion da *Patrice Mayer* han lura las dunnas ed ils umens er gist dà a l'occurrenza il vestgì musical ed uschia confermà che er a Scuol viva la musica. Benevotads èn ils 80 delegads e blers giasts er vegnids en moda cordiala da *Christian Fanzun*, il «capo» da la vischnanca da Scuol. En il center da la radunanza 2015 è lura stada ina persuna, e quai è *Robert Casanova*, il Lumnezian, che ha manà sonda passada en l'Engiadina Bassa sia davosa radunanza da delegads sco president da l'Uniun chantunala da musica dal Grischun. Numerus preschents èn be vegnids a Scuol per mussar la gronda atschadadad per il president partent, per exprimer ses respect envers l'um che ha vivì di per di per la musica e betg il davos er per engrazià a Robert Casanova per tut quellas bleras uras cuminaivalas e cunzunt er empernaivlas.

**Direct e cun ina exactezza**

Robert Casanova saja stà in um plain iniziativa, ina persuna fitg directa e cun-

zunt in president cun ina exactezza exemplarica, ha ditg *Not Janett*, il vicepresidente da l'Uniun chantunala da musica dal Grischun. Ultra da quai saja el er adina stà in um da pled, in president da fidanza e cunzunt ina persuna cun in umor simpatic e da cor. Per la musica haja Robert Casanova prendì gugent tant temp sco pussaivel ed en quels 11 onns sco president savens renunzià a la vita privata be per la musica ed en spezial per l'uniun da musica da noss chantun, ha menziunà *Not Janett*. Sulet l'onn passà haja el represchentà 48 giadas l'uniun tar occurrenzas da musica en il chantun ed er ordaifer quel. Cun in ferm e lung applaus e cun sa dulzar da las sutgas han ils preschents lura ditg adia als president partent, el che vegn en in onn lura ad esser gugent giast tar la radunanza annuala a Flem e quai sco commember d'onur da l'uniun.

**Prender temp per far musica**

A pled è er vegnì *Martin Jäger*, il cusseglier guvernativ e schef dal departament da cultura. Er el ha chattà be buns plets per il president partent e ludà la buna collavuraziun er en quels onns cura che Robert Casanova era en il cussegl grond. Da prender temp per far musica saja da gronda impurtanza e cun plaschair haja el constatà che la qualitat da quella saja s'augmentada ils davos onns er tar nus. Insumma saja la qualitat da la cultura en noss chantun sin in nivel fitg aut, tant la cultura professiunala sco er la cultura amatura. *Martin Jäger* deplorescha fitg ch'il Grischun è ferm per-

tutgà da la demografia, uschia che er las societads da musica sajan pertutgadas da quest svilup displaschavel.

**In um da la musica**

Sco successur da Robert Casanova han ils preschents lura elegi *Andy Kollegger*, l'um da 48 onns d'Alvagni e sesent a Cuir. Ad el è la musica bunamain vegnida messa en tgigna cun esser stà ses bab *Heiri Kollegger*, ina persuna che ha passa 70 onns fatg cun plaschair musica. Tar la famiglia Kollegger, ina famiglia dad otg uffants, ha la musica adina gi in post fix en la vita quotidiana e quai anc oz. *Andy Kollegger* ha ditg ch'el saja sa decidì gugent per la musica e per l'uffizi da president da l'Uniun chantunala da musica dal Grischun e cun quai da desister sin ina candidatura per il cussegl naziunal. «Musica instrumentala fà plaschair, colliescha, integrescha e segna per collegialitad», ha ditg *Andy Kollegger*. Grazia a la musica sajan en sia vita s'avridas bleras portas e perquai less el restituir in pau a la musica cun surpigliar l'uffizi da president chantunala, ha ditg il Surmiran. Robert Casanova saja per el in bun exempel, ina giada per ses grond engaschament per la musica, dentant er sco persuna. *Andy Kollegger* ha ditg che ses antecessur saja in um cun in carisma singular, fitg avert, plain umor, fidà e cun ina perseveranza exemplarica. Quels aspects sajan er per el da gronda valur ed uschia surpiglia el gugent il post da president, ha accentuà il successur da Robert Casanova.



Dus umens ed omadus personas engaschadas per la musica (da san.) Curdin Samuel Brunnold ed Arnold Spescha.



Gratulaziuns er da dus Surmirans per il nov president. (da san.) Lucas Thöni, il president dal District da musica III, Andy Kollegger, il nov president, Robert Casanova, il president partent e Josef Schaniel, il president dals veterans da musica da noss chantun.



Omadus dus presidents. (da san.) Reto Mayer, il president da la cumissiun da musica, e Duri Campell, il president dal cussegl grond.



Er els fan part a la cumissiun da musica. (da san.) Gian Carlo Caviezel ed Ivan Vinzens.



Daniela Vincenz surdat cun plaschair la cravatta da l'uniun al nov president Andy Kollegger.



Il bandierel Teofil Manetsch.